

PERANG BUKIT PUTUS, perang saudara pertama di Negeri Sembilan. Perang ini berlaku pada tahun 1875 antara Yamtuan Antah dengan Tengku Ahmad Tunggal berhubung pemilihan waris takhta. Perang ini melibatkan campur tangan pihak British yang mengambil kesempatan daripada perbalahan yang berlaku antara pembesar negeri untuk mengukuhkan kedudukan mereka di Sungai Ujong.

Setelah Yamtuan Imam (Yamtuan Seri Menanti Keenam) mangkat pada tahun 1869, jawatan Yamtuan telah dituntut oleh putera sulungnya, Tengku Ahmad Tunggal. Walau bagaimanapun, pembesar negeri tidak bersetuju kerana perilakunya yang kurang baik. Untuk menyelesaikan perbalahan ini Dato' Imam Perang Siamang Gagap (salah seorang menteri yang memegang tampuk pentadbiran) telah mengangkat Tengku Ampuan Intan, balu kepada Yamtuan Imam, sebagai Pemangku Yamtuan sementara menanti pelantikan calon yang sesuai. Pada tahun 1872, pembesar negeri bersepakat untuk melantik Tengku Antah, anak Yamtuan Radin (kekanda kepada Yamtuan Imam), sebagai Yamtuan Seri Menanti.

Tengku Ahmad Tunggal yang tidak berpuas hati dengan pelantikan tersebut telah menemui Dato' Kelana Sungai Ujong, Dato' Syed Abdul Rahman @ Syed Aman, untuk meminta pertolongan. Dato' Kelana sendiri berbalah dengan Yamtuan Antah berhubung tuntutan ke atas daerah Terachi yang terletak di antara Seri Menanti dengan Sungai Ujong. Krisis memuncak apabila Dato' Terachi yang dilantik oleh Dato' Kelana sebelumnya iaitu Dato' Kelana Sendeng dipecat oleh Yamtuan Antah pada tahun 1875.

Pada waktu yang sama, Dato' Kelana Syed Abdul Rahman juga berbalah dengan Dato' Syahbandar Tunggal yang dipertanggungjawabkan tentang pungutan cukai di Sungai Ujong. Dalam perbalahan ini, Yamtuan Antah menyebelahi Dato' Syahbandar Tunggal. British yang tidak berpuas hati tentang cukai yang dikenakan oleh Dato' Syahbandar ke atas aktiviti perlombongan bijih timah telah memihak kepada Dato' Kelana dan mendesak Dato' Kelana memerangi musuhnya dengan bantuan British. Soal tuntutan Tengku Ahmad Tunggal terhadap jawatan Yamtuan Seri Menanti menguatkan alasan British untuk mendesak Dato' Kelana menyerang Seri Menanti.

Kejadian pemecatan Dato' Terachi oleh Yamtuan Antah merupakan satu alasan yang baik bagi British untuk bertindak. Dengan permintaan Dato' Kelana Syed Abdul Rahman, Residen British di Sungai Ujong, Patrick J. Murray, telah menghantar satu pasukan tentera di bawah pimpinan Leftenan Hinxman untuk meninjau keadaan di Terachi pada 27 November 1875. Sebilangan anggotanya telah dihantar untuk menjalankan kerja-kerja mengukur tempat di antara Kampung Terachi dengan Kuala Pilah. Kumpulan ini telah bertembung dengan pasukan Yamtuan Antah seramai 200 orang serta menyuhr mereka berpatah balik ke Seremban. Apabila British

enggan berundur, Yamtuan Antah mengerahkan pasukannya seramai 4000 orang di bawah pimpinan Dato' Imam Perang Siamang Gagap untuk menghadapi British. Pasukan Yamtuan Antah bergerak merentasi Bukit Putus dan berjaya mengundurkan tentera British ke Paroi. Pihak British kemudiannya berkubu di Rasah sementara menanti bantuan tentera dari Negeri-Negeri Selat. Pasukan Yamtuan Antah telah mengasak British dan berjaya menawan Paroi pada 2 Disember 1875. British cuba menawan Paroi semula dengan bantuan pasukan dari Melaka di bawah pimpinan Leftenan Peyton. Orang Cina di Negeri-Negeri Selat turut membantu tentera British dengan menyediakan buruh untuk mengangkat bekalan dari Melaka ke Sungai Ujong melalui Lukut. Askar Gurkha dari Pulau Pinang juga dikerah bagi menambah kekuatan British.

Yamtuan Antah dan pasukannya menjadikan rumah-rumah di Paroi sebagai kubu pertahanan. Pasukan utama Seri Menanti tersebut dibantu oleh 600 orang tentera yang ditugaskan bagi mengukuhkan pertahanan. Walau bagaimanapun, serangan British yang dibantu oleh pasukan meriam berjaya menembusi kubu pertahanan Yamtuan Antah. Pada 10 Disember 1875, pihak British berjaya menawan Bukit Putus dan terus memasuki Seri Menanti. Mereka bertindak membakar rumah-rumah penduduk kampung termasuk istana Yamtuan Antah di Seri Menanti.

Yamtuan Antah pergi ke Johor dan menghadap Sultan Abu Bakar. Baginda menasihati Yamtuan Antah supaya menemui Gabenor Negeri-Negeri Selat, Sir Frederick Alusysweld. Rundingan yang dibuat akhirnya menyetujui Yamtuan Antah hanya menjadi Yamtuan di Seri Menanti yang merangkumi luak Johol, Inas, Ulu Muar, Jempol, Térachi dan Gunung Pasir. Dato' Kelana Syed Abdul Rahman hanya memperoleh kuasa yang lebih di Sungai Ujong yang merupakan matlamat sebenar British. Tengku Ahmad Tunggal tidak mendapat sebarang hak dalam penyelesaian tersebut. Perang Bukit Putus memberi peluang kepada British untuk mengukuhkan kedudukannya di Negeri Sembilan khususnya di Sungai Ujong.